

穆宗隆慶五年辛未起
熹宗天啓元年辛酉止



五

中
華
書
局

國權卷六十七

辛未隆慶五年

正月朔己巳賑文安永清薊霸等水災免其屯租。

辛未享太廟。

甲戌吏部大計旌入觀卓異按察使勞堪江一麟僉事蕭大亨知府丁應璧徐學古侯必登李渭高文薦同知章時鸞知州許希孟知縣林會春徐成位曹大埜劉不息各衣一襲鈔百錠宴禮部下貪酷知府徐必進等二十五人于巡按御史追入之。

丁丑翰林修撰申時行爲左春坊左中允國子司業王錫爵爲右春坊右中允並兼編修。

己卯戶部請覈觀官進賦計其數駐俸鑄級從之。

乙酉湖廣土寇覃璧平。

己丑大風霾。

庚寅閣臣請率百官朝東宮于文華門許之以二月既朔。

辛卯翰林編修余有丁爲國子司業。

徵光祿寺二十萬金以部科諫半之。

壬辰南京太常寺卿袁洪愈致仕。

南京戶部右侍郎喻時卒。

署都督同知廣東總兵官郭成改四川討山寇。

二月。張朔甲午。廷臣及入覲官謁東宮于文華左門。

乙未。左都御史葛守禮言。禁奢僭厲風俗一事。上是之。

丙申。山西按察副使張學顏爲右僉都御史。巡撫遼東。

戊戌。祭太社太稷。

己亥。開日講。

少傅大學士張居正。詹事府吏部左侍郎兼翰林學士呂調陽主禮闈。

設分守惠潮參將。

庚子。總督尙書王崇古上言。互市甚利。若拒而不許。彼必且飛揚跋扈。宜大或以遭降之恩。可保數年不侵。其禍且東中遼薊。西中關陝矣。先朝嘗封太平賢義安樂及哈密忠順王故事。臣謹條八議。曰。錫封號官職。俺答可賜王號。頒印。俾號召其子弟。爲國藩籬。餘如老把都兒及吉囊長子吉能。俺答長子黃台吉。宜授都督。他子弟如兀慎打兒漢等四十六部。宜授指揮。俺答壻十餘部。各授千戶。假名器以服強胡。使無犯邊。曰。定貢額。虜之貢意實希賞。許歲一貢。俺答馬十四。來使十人。老把都兒吉能。黃台吉各八匹。使各四人。諸酋以部落大小爲差。大則四匹。小則二匹。使各二人。共貢馬毋過五百。來使毋過百五十人。馬分三則。上馬三十四。進御。餘給值有差。歲六十人入京。餘留境上。還以金繒布等分賞諸酋。曰。酌貢期貢道。虜入貢互市。宜春月馬弱之時。且及萬壽節上表。自大同左衛驗入給賞。分駐各城。其入京遣官送入居庸關。自昌平入朝。虜四夷館聽禮部繩給事。訖由故道。所歷將領盛陳兵仗示威重。戎交通傳泄。曰。立互市。漠北無他產。釜繒之具。仰賴中國。今誓絕侵犯。即求互市。庶免盜竊。彼以金銀革駝等。我商販繒紬布釜等。卜日開市。彼三百人住塞外。我兵五百住市。

場貿易盡月而止。市場大同則左衛之威虜堡。宣府則萬全右衛之張家口。山西則水泉營。至期商卒不得闌出禁物。罔利啓釁。罷市後有擾邊者。檄俺答及各酋核之。曰撫賞之費。各鎮歲備邊。則有調遣客餉。春秋擺邊。則有行糧米草。各營有探哨夜役行糧。各墩有常廩行月二糧。其費不貲。又犒賞優卹之具。皆督撫贖鍰及各城商稅地租。歲不下數千金。今可省爲撫賞各夷之需。如不足支。年例客餉。夷使及守市夷兵各布二匹。酋長繒二匹。紬二匹。餘使以好至。量加賞犒。曰歸降。朝廷懸招降之例。華人歸正者十七。眞夷避罪來降者十三。今既許通貢。自後罪夷投降。俱免收納。華人歸正。許騎來馬住邊堡。如追騎至。卽給以馬。量與紬一布二。曰審經權。俺答納款。當優受降之禮。議者必欲峻其始。要其終。夫春秋之列國。漢唐之封建。雖友邦同姓。尙不能守法信度。而欲責之夷虜。恐非達權之宜也。俺答年近七十。老把都兒黃台吉。吉能各年逾五十。倘各酋未死。邊境有數年之安。則宣大山西。殘城可漸實。燕田可漸墾。客兵可漸減。練卒積餉。設險除器。靡不豫圖。守可固。戰可勝。雖一時羈縻之微權。而保固疆圉。生全邊氓。不旣多乎。曰戒狡飾。今之爲將。務爲誇誕。謂宜戰不宜和。搖奪邊計。請敕九鎮將領。乘暇修備。使虜知我之有待。不敢復叛。或陰懷異志。則揚兵伐謀。使虜不敢乘我之虛。其造言飾詐。陰壞貢議者罪之。命下兵部廷議。

辛丑。雲南道監察御史汪文輝上治體四事。專責言官。曰。先帝末年。大臣寅恭。稍議論不合。意見各殊。一二言官。遂窺其所向而攻其所忌。至顛倒是非。熒惑聖聽。傷國家大體。如復踵弊傾陷。忠詐莫辨。則宋元祐之事。可爲永鑒。此觀望當戒也。曰。祖宗立法。至爲精密。而卒有不行者。非法之弊也。患不得其人耳。今言官條陳。皆因噎廢食。銳意更張。部臣重拂其情。遷就題覆。及其法立弊生。又議復舊。非惟民無畫一之守。而部覆日亦不足矣。自今宜求任事之人。勿重于違言官。輕于變祖法。一切瑣碎迂闊之說。悉格不行。此紛更當戒也。曰。古之大臣坐事退者。皆微其詞。以養廉恥而存國體。今或掇其已往。揣其未形。疑似影響。爭相詬病。如市井喧鬧。爲衆

嗤笑。是人已兩失之也。至方面重臣。苟非奸惡。亦宜棄短取長。爲人才惜。今或搜其小疵。極言醜詆。使決于引去。國家安得全才而用之。此苛刻當戒也。曰。言官能規切人主。糾彈大臣。而其所短。亦係天下萬世之議。欲自護不得也。今言論或不當。部臣不覆。卽憤然不平。夫不肯認錯。何以感格君父哉。自今言官宜以公天下之心言之。大臣確議當否。毋襲故套。雖彼懷憤于一時。終媿服于後日。此護短當戒也。上報聞。時趣其言亡何。遷陝西按察僉事。

支大綸曰。汪君此疏。真救時之讜論。邪佞之針砭也。使用于戊辰。則高拱不狼狽而去國。用于辛未。則徐階不遑遽而所求。憒夫壬人。假風聞言事之權。殺人媚人之毒。縱能得私于一時。其能終追于天網乎。

癸卯。總理河道侍郎翁大立。總督漕運侍郎趙孔昭。皆劾罷。

處州諸生毆分守參議方岳。戊十二人。

甲辰。刑部右侍郎游居敬。順天府尹姚一元。勒致仕。應天府尹周倬。操江右僉都御史調雲南。副使吳時來。罷。江西左布政使馮惟訥。乞休。以清慎。加光祿寺卿。

貢士趙蒙吉。授國子學正。蓋趙貞吉之弟。南京國子祭酒姜寶薦其學行。

丙午。廣西桂林地陷。

戊申。浙江雲南左布政使郭朝賓。鄒璉。爲順天應天府尹。

己酉。兵部右侍郎谷中虛。爲左侍郎。巡撫山西右僉都御史石茂華。爲兵部右侍郎。南京大理寺卿朱大器。爲刑部右侍郎。

庚戌。通政司右通政胡杰。爲南京太常寺卿。

辛亥。鎮遠侯顧寰。仍總督京營。

壬子。南京廣積廣惠庫火。

遣內臣往陝西織絨。部科止之不聽。

乙卯。刑科左給事中竺東光免。東光言事狂悖見輕。心怏怏成疾。大呼于會極門。

丙辰。浚金水河。

戊午。巡撫遼東右僉都御史毛綱奔喪不候代被劾。命服除左遷。

己未。封皇子翊鏐潞王。

朱冠爲署都督僉事總兵官。鎮守浙江。

庚申。陝西左布政使曹金言。地曠事冗。乞增左參議一。分守關內道。按察僉事一。管屯田水利。郡縣佐貳及教官各數員從之。

三月。尅朔。古田盜平。擒斬七千三百人有奇。而渠帥韋銀豹之首僞也。蓋銀豹度已不免。以莫諫成貌類。因醉斬之。函獻。尋殷正茂知之。密購數日而得上章自劾。械京師。磔于市。

甲子。兵科都給事中章甫端言。虜得封號。則衆且益附。是假之翼也。入我境則窺我文物。是啓其心也。給事中宋應昌言。虜雖通貢。情或難測。防邊則有兩費。撤兵則非萬全。張國彥言。虜向入寇。每旋出塞者。虞西北諸戎踵其後耳。彼無我患。則專意諸戎。諸戎必折而入于俺答。是加之左右臂而益其強也。請乞之費。歲加月倍。客餉不已。必扣主兵。主兵不已。必及市賈。市賈不已。必及內藏矣。詔下廷議。諸臣言利者十一。言害者十九。尙書郭乾意惑之。終持兩端。請先授都督。令諸酋各自爲部。毋統攝。俟奉約一二歲始封貢。使留邊城。毋入京。市期自二月至四月爲率。毋拘聖節。上命復議。

玉田伯蔣榮卒。

丙寅。夜。月犯畢宿。

丁卯。通政司右參議宋訓。延綏巡撫右僉都御史何東序。劾免。巡撫江西右僉都御史李一元降調。復議膠萊運道。戶科給事中李貴和言之。命工科給事中胡禳往視。

己巳。上御文華殿。日講畢。輔臣李春芳等具言封貢之利。上曰。卿等議定。其卽行之。自是浮論稍息。庚午。冊榮妃汪氏。安妃楊氏。和妃趙氏。容妃韓氏。

巡撫浙江右副都御史熊汝達爲南京刑部右侍郎。山西左布政使楊綵爲右僉都御史。巡撫山西。

兵部尙書郭乾再集議封貢。上言。漠北來王。古今盛事。而因以羈縻。實制馭長策。九塞諸虜。俺答最雄。自上谷至甘涼。穹廬萬里。東服土迷。西制吉丙。先年以謝絕致憤。遂致駘籍諸邊三十餘年。中原苦不支矣。今儼然聽命于藩籬之外。是三十年所禱祀而求者。何惜藁街尋丈之地。而以隔虜情。隘皇化。失神靈所希望。宜從其請。若搗巢可罷。燒荒不可罷。從之初。巡撫方逢時言。諸降人甘心于虜。而虜亦厚結以自植。若招之于款後。是示以不信也。虎方據鹿。不制其虎而取鹿。不爲虎所傷者幾希。自諸逆膏斧。餘衆破膽矣。彼何能爲。而況我旣臣虜。其人旣我也。不若因而撫之。明示不殺。使反側自安。不然。所招者徒得旄倪。雖千百不損其毫毛。而徒令奸人藉口構禍也。于是弛招降之令。

壬申。復山東督糧左參議。

張元勳爲署都督僉事總兵。鎮廣東。

癸酉。新昌王厚燾薨。諡端僖。

甲戌。禮部覆吏科都給事中韓楫。以藩戚入任。除同祖親支外。得推陞京秩。從之。

丙子。策貢士于皇極殿。賜張元忭。劉城。鄧以讚等進士及第出身有差。

兵部右侍郎王遴歸省。

左都御史葛守禮申明巡按事宜。正體統。修本務。慎訪察。簡受訟。嚴舉劾。倡節儉。命即行之。

丁丑。兵部尚書郭乾劾罷。

辛巳。日暈有珥。白虹貫天。

壬午。順天府尹郭朝賓巡撫寧夏。沈應時爲右副都御史。巡撫浙江江西。

南京太常寺卿胡杰卒。豐城人。嘉靖辛未進士。

乙酉。禮科都給事中張國彥請召對大臣。并錄先帝要事二十九則以進。報聞。錄留覽。

起少傅楊博爲兵部尚書。太子少保高儀掌詹事府。高拱薦之。

丙戌。改古田縣曰永寧州。立守禦千戶所。

戊子。主事吳文佳侯于趙爲吏兵科給事中。朱光宇趙宣張克家爲御史。周大烈爲南京兵科給事中。田成法

李之珍爲御史。

己丑。封俺答順義王。賜緋蟒衣一。綵幣八。敕曰。朕纘緒五年。愛養生靈。胡越一體。頃爾孫來歸。特命邊臣護視。給其服食。厚加撫納。以禮遣還。爾感恩內屬。歲歲入貢。永爲荒服。俘獻叛賊。懇款再三。朕念北番朝貢。代固有之。在我國家。亦惟常典。爾能慕華。請命深識。天道。朕實嘉悅。特允所請。爾弟爾子及諸部長。俱授都督等官。俾世居本土。逐草射獵。同樂太平。朕代天覆轉萬國。無分彼此。照臨所及。悉我黎元。仁恩惟均。無或爾遺。爾尙堅守臣節。約束爾衆。保境息民。世世安樂。朕國家膺萬年之天運。爾子孫亦保萬年之福澤。豈不永利哉。倘爾部衆。或背初心。擾我邊境。是乃自乖大義。輕棄盟言。天地鬼神。實共鑒臨。爾其體悉朕意。尙欽承之。

劉紹恤曰。漠北爲難。自古患之。周以降。漢唐宋亡論矣。高皇帝爲百姓請命。舉韋韞而驅逐之。豈不視其魄。

哉。靖難後移師北伐。直犁其庭。又何烈也。土木之狩。敵勢方張。正德嘉靖。妖纏鼎畢。上谷雲中。幾殆矣。一旦憬然納款。曰求厥章而爲臣。洪永之際。于斯爲盛乎。嗚呼。諸亡命爲虜腹心。豈不仇之深。顧使之猖獗二十年。舛矣。孰謂一胡雛遂制其死命哉。假令把漢內附。處或失策。則諸亡命不死。諸亡命不死。俺答未必悔禍而爲之臣。邊民詎能有今日乎。語云。方叔元老。克壯其猷。侯誰在矣。張仲孝友。天保采薇之風。所謂相得而益彰者非耶。

馮時可曰。自餌虜後。中國所費三十萬金。所省徵調費不啻百萬。由上谷至河湟萬里。居如堵。行如家。舉沙磧而黍苗之矣。猶有虞焉。沿邊荷戈之士。外則供市。內則供役。旁則供帥。而虜來則資我。去則掠番。是彼有兩利而我有三害也。且板升扒沙盛。而以中國窺中國矣。土番瓦剌併。而以虜合虜矣。有如雄鳥出。安知其不以今日之馴鳥爲他日之封豕也。

何喬遠曰。天道恢恢。豈不大哉。雖窮荒異類。人行其間。也先很悍。卒不得其死。俺答亡大志。求貢市而已。屢請不許。憤焉蹂邊者三十餘年。其晚年稽首稱外臣。以善終。蓋明興以來。虜至強矣。古云。虜者天之驕子。非也有豪杰生其間焉。則強。至謂縉紳之儒。專主和親。介冑之士。專論征伐。今乃反之。縉紳之儒。則主征伐。介冑之士。斯議和親。一當其難。一不履其事也。然予考論邊防之道。亡他焉。謹烽火。嚴斥埃。信賞必罰。與士卒同甘苦。古人備矣。夫人君者。蓋在禦將哉。蓋在禦將哉。

談遷曰。俺答有驍騎十萬。其精兵俱鐵兜牟。長子黃台吉。雄黠善用兵。竟以孽孫之故。弭耳帖服。昔冒頓不愛其子女。倘俺答不顧其孽孫。悉甲臨邊。我雖制勝。夫豈有斬焉。幸不用趙全之計。受餌稱臣。則垂老之年。重內顧而悔狂逞也。太公稱衛霍天幸。予于昭陵時亦云。

庚寅。江西左布政徐斌爲順天府尹。

陝西總督王之誥議。吉能子弟二年不犯。可許市。總督宣大王崇古上言。吉能卽俺答親姪。勢相依倚。許俺答不許吉能。是鋼其首而舒其臂也。俺答必陰呼吉能之衆市晉。而吉能亦必陰藉俺答之衆窺秦。是晉爲秦受困。而秦爲晉申禍也。兵部復言。近者互市。與往日不同。昔捐官。今資商。或有不足。宜權爲應。當此物力方虛。慎毋以官市犯先帝所禁。

吏科左給事中賈三近往勘貴州安國亨。以國亨與安信仇殺。阮文中請兵之。兵部議勘。三近既行。文中又言國亨出就理。召三近還。

陝西西鄉盜平。

下巡城御史緝游民。

辛卯。山西按察使張蕙爲右僉都御史。巡撫寧夏。

倭入廣東。

四月。廷朔。命饒州作陶器十萬有奇。工科都給事中龍光等請減十之三四。且寬其程。不聽。

癸巳。大理寺卿董傳策求改南京便養。許之。

甲午。河再決邳州。

乙未。河東巡鹽御史邵永春劾總督王崇古弟侍郎張四維父並怙勢壞鹽法。各疏辨。不問。

丙申。王應龍嗣成山伯。

庚子。月犯軒轅星。

辛丑。順天府治中張德恭。刑部員外郎包大燿。前從祀太廟偶語。坐不敬。謫德恭河東鹽運副使。大燿兗州通判。

釋輕囚。

癸卯。南京給事中王禎等御史潘允哲等請罷貢市。報聞。

甲辰。刑部定各省如熱審例。減徒杖以下罪。

乙巳。刑科都給事中王之垣上承天基命事實三卷。

辛亥。授虜酋昆都力哈俺答弟把都兒黃台吉都督同知。賜獅衣一。綵幣四。賓兔台吉等十人指揮同知。那木兒

台吉等九人指揮僉事。打兒漢台吉等十八人正千戶。阿拜台吉等十二人副千戶。恰台吉等二百人百戶。

刑科都給事中王之垣等請諸進士讀律。從之。

丁巳。英國公張溶罷後府。恭順侯吳繼爵罷左府。

戊午。傳制封碩曠唐王。綰煥肅王。翊鏢金谿王。慎鏢義寧王。在鎔永寧王。憲燿光澤王。

京師大雨雹。

庚申。左都御史葛守禮上官箴士節六事。端趨向。崇節儉。正心術。勤職業。敦禮讓。弘器度。上然之。

五月。尙朔。南京禮部右侍郎秦鳴雷爲南京禮部尙書。

起汪道昆右副都御史。巡撫湖廣兼贊理軍務。

懷仁王俊榭薨。諡莊簡。

敘古田功。進提督侍郎李遷右都御史。巡撫殷正茂兵部右侍郎。各仍故任。餘陞賚有差。

乙丑。陝西貢士呂潛薦授國子學正。

丁卯。順天府尹徐枋爲右副都御史。巡撫江西。河南右布政使凌雲翼爲右僉都御史。提督撫治鄖陽。

巡撫廣西右僉都御史殷正茂。請修舉鹽法。足兵食。販鹽在廣西。出鹽在廣東。行鹽在湖廣。官出貲。歲市二百

覲時值消息。可充歲餉。從之。

甲戌。大理寺卿張翀爲兵部右侍郎。南京國子祭酒萬浩爲南京禮部右侍郎。

丙子。廣安王載堂薨。諡康裕。

丁丑。司禮太監陳洪同法司錄囚。

戊寅。少師兼太子太師吏部尚書中極殿大學士李春芳致仕。遣行人曹銑護歸。敕曰。由狀元爲執政。馮京不愧乎科名。以宰相而養親。王溥見榮于當世。古稱盛事。今乃兼之云云。春芳爲人性寬平。事期安靜。不好爲躁刻。時人比之李時。其氣力不如也。而潔廉過之。晚扼于高拱。不得舒時。猶取裁不至過甚。

支大綸曰。李春芳員狷善宦。飢餒易容。政在徐階。則媚徐。政在高拱。則讓高。蓋深于老氏之術者。若宦豎縱橫而不能揀。中宮失位而不敢言。則徐與高皆然。又不可以罪李也。

朝臣予告。堂上官按其實代奏。始部覆。

己卯。漢陽知府孫克弘罷。克弘遣蒼頭入京。或妄傳徐階所使。給事中韓楫宋之韓欲中階。自往捕之。求階事亡跡。僅克弘所通故人書也。之韓謂階子太常卿璠少卿琨等乾沒松江上供金錢。使引徐氏舍人悉逮而籍之。徐氏子使舍人置京邸私市。給事中張博等復論階三子下巡按御史逮克弘。免官。

左府囚逸。

戊子。大學士高拱以首揆辭銓務。不允。

宣府獨石大雨雹。

御史蕭廩言。薊鎮入衛兵。卽于掣兵之日放歸。免留備冬春。從之。

六月。辭朔。京師地震。詔修省三日。

前吏部左侍郎靳學顏卒。學顏濟寧人。嘉靖乙未進士。自南陽推官。歷□□左布政。登朝。淳謹修潔。文行並足。重云。

甲午。宣府乾莊堡大雨雹。

乙未。張齊補順天通判。兵科左給事中周芸御史李純朴爲故給事中張齊訟冤。并論刑部尙書毛愷左都御史王廷迎附徐階。削廷籍。奪愷原官。

戊戌。提督贍黃通政司右通政張鹵歸省。

己亥。吏部定督撫出入更調。須實俸考滿。其候代地方者亡論。

庚子。山西布政司右參政廖逢節爲右僉都御史。巡撫甘肅。

南京翰林侍讀學士陶大臨爲南京國子祭酒。

禮部員外郎張孟男爲尙寶司丞。孟男雖高拱密戚。引避不時見。

壬寅。選翰林院庶吉士趙用賢王祖嫡史鈞趙鵬程何汝成黃洪憲劉虞夔蕭崇業趙參魯漆彬張應元吳中行孫訓石應岳張程秦耀公家臣王懋德劉楚光劉克正劉元震趙耀李盛春王守誠宋範宋儒孫成名劉諸熊敦朴盛訥修撰張元忬。編修劉城鄧以讚俱入館肄業。鼎甲自嘉靖丙戌後不受課。至是復故。

甲辰。許西虜通貢。授吉能都督同知。其下四十九人授指揮千百戶有差。賜吉能獅袍一。綵幣四。

瞿九思曰。世議開市之非策也。是大不然。敗市者惟卜失兔一人。自取殄滅。而土昧把都隱布諸酋。恭順相承者世世。是害一而利十也。權其輕重。市若便焉。

乙巳。吏部言。任子自宗人五府出。多雲貴兩廣遠郡守。不旋踵輒罷。非厚也。乞自今任子得陞部署及京府治中太僕寺丞等官。果稱職則陞郡守藩臬。不必遠地。郡守藩臬又稱職。又遞遷之。毋限格。從之。

丁未。禮部集議宗藩廩祿。在國家苦供給之無措。而意外可虞。在宗室苦祿糧之不給。而顛連可閔。公私兩困。勢不容不少變。爲今長計。惟限服制。以殺其祿給。聽自便。以開其生路。嚴法制。以禁其爲非。審時酌變。毋過于此。從之。

安丘王府奉國將軍觀熈。有罪賜死。

戊申。南京兵部右侍郎姜廷頤。考滿。廷見聲輕。許致仕。

壬子。大理寺右少卿王治。爲太僕寺卿。

署都督僉事。謝朝恩爲總兵官。鎮守寧夏。

甲寅。順義王俺答及昆都力哈等貢馬五百九匹。使者六十四人。表進上馬三十四。銀鞍一。

太子少保禮部尙書高儀署詹事府吏部左侍郎呂調陽並教習庶吉士。

乙卯。高拱言。國初進士鄉舉並用。今進士偏重。鄉舉甚輕。欲興治理。宜破拘攣之見。開功名之路。凡保薦考選。勿拘出身。從之。

丙辰。俺答縛趙全餘黨趙宗山等十三人來獻。賜金三十幣。四。

戊午。高拱言。行太僕苑馬寺鹽運司官。皆要政。非閒局也。近視之甚輕。輒劣處者充任。殊非設官初意。乞推補廉謹有才望者。又定其格。卿視參政。運長視副使。遷陞如故事。從之。

庚申。工科左給事中胡禎還奏。開膠萊河。臣至分水嶺。問王獻所鑿渠。皆流沙善崩。白河細流。不足灌注。現河小膠河張魯河九穴都泊。稍有潢污。亦不深廣。膠河雖有微源。然地勢東下。不能北引。則諸河之不足資明甚。分水嶺以南。陳村閘以北。又皆岡石糜沙。不可鑿。雖近海通潮。將安達之。上遂罷膠河之議。

七月。醉朔。西安地震。

起王化惠潮兵備僉事。化前廣東副使。削籍。巡按趙燝薦其知兵。限三年立功自効。

乙丑。改新鄭徑隸開封府。舊隸鈞州。去縣遠。

丙寅。大理寺丞孫丕揚罷。蒲城知縣呂宗儒貪敗。疑丕揚嫉人劾之。至是入京自理。而不揚嘗劾高拱。故坐斥。

己巳。上御皇極殿。受俺答貢。羣臣表賀。

庚午。蔡國熙爲按察副使。整飭蘇松兵備。國熙前守蘇州。潔惠及民。徐階僕橫于蘇。窮治之。御史不善也。遂引去。至是高拱擢之以跡階。松人羣起訟之。階三子皆就繫。擬以城旦。革其廕。敘入田四萬畝于官。拱再召時。語人曰。華亭有舊恩。後小相失。不足爲怨。久之稍修郅。亦羣小咻之也。

許科臣計俸三年通考。時科臣多驟遷。不得貤封。吏科都給事中韓楫欲爲之地。託言久任。特破例通考。

廣西總兵俞大猷被劾罷。

辛未。南京工部尙書曹亨。劾織造太監劉安不法忤旨。罰俸三月。

壬申。賈俺答及其妻各部目衣幣。其上馬每匹酬繒二絹一。

乙亥。巡撫福建右僉都御史何寬爲大理寺卿。

夜月食。

戊寅。開經筵。己卯日講。

大學士高拱等言。庚戌以來。先帝屢詔修塞。卒無成效。非徒當事者不力。實以虜擾應接不暇。尺寸未成而尋丈已壞矣。今幸虜款。勢若可爲。且諸邊戍卒非減也。司農歲額不能省也。而卒以益疲。吏以益狎。則患豈必在虜。乘此閒暇。培根固本。雖虜欲背成。而我歲有歲功。月有月效。十年無事。常勝在我矣。則和可戰可。虜戰于虜。守于和亦可。不然。齋空囊而戰。戰不可。晝空城而守。守不可。抱空約而和。和又孰可。臣請自今每三歲遣近

臣視九塞。以八事殿最邊吏。積餉。修險。練卒。鍛甲。督屯。理鹽。養馬。招降。皆以數課吏。治其功罪。績著者同斬虜。廢壞者做失機。上從之。

庚辰。有二龍。午見莆田縣東海中。驅浪遊田間。露身。人皆見之。

辛巳。巡撫南贛汀韶殷從儉爲右副都御史。巡撫福建。

甲申。南京刑部右侍郎熊汝達改南京兵部。右僉都御史李棠爲右副都御史。巡撫南贛汀韶。提督軍務。丙戌。許學倉驛遞閘壩等官得任本省。

丁亥。前兵部右侍郎兼右僉都御史李一元待降。稱疾篤。不任。上以怨望。削籍。故少詹事兼翰林侍讀學士黃佐。贈禮部右侍郎。諡文裕。

己丑。提督操江陳省爲右僉都御史。

八月。黷朔。旌順天翟思榮妻張氏貞烈。是年六月。思榮卒。張絕粒死。

壬辰。南京刑部尙書陳其學致仕。

己亥。楚王英煥薨。諡恭王。

提督兩廣右都御史兼兵部左侍郎李遷爲南京刑部尙書。尋致仕。庚子。宣寧王俊相薨。諡昭榮。

辛丑。總理河道工部右侍郎兼右僉都御史陳大賓卒。

癸卯。許西廩開市。總督戴才請寧夏市清水營。延綏市紅山墩。

丙午。漕舟阻于邳河。奪總督陳夔總兵陳王謨俸。命御史張憲翔催督。己酉。各軍行糧。惟警調得支。餘皆冒支論。御史余希周議。